



## UPM Iktiraf Pelajar Menerusi ANC



*Barisan penerima ANC UPM kali ke-11 bergambar kenangan di Hotel Marriot, Putrajaya.*

**PUTRAJAYA, 21 April** – Universiti Putra Malaysia (UPM) mengiktiraf kejayaan 65 pelajarnya yang cemerlang dalam bidang akademik dan kokurikulum menerusi Anugerah Naib Canselor (ANC) ke-11.

Seramai 183 pelajar telah memohon anugerah ANC Sesi 2009/2010 yang mensyaratkan pencapaian Purata Nilai Gred Kumulatif 3.00.

Naib Canselor UPM, Prof. Datuk Dr. Nik Mustapha R. Abdullah berkata ANC adalah sebagai pendorong kepada pelajar untuk meraih kecemerlangan ilmu dengan memperoleh keputusan akademik yang cemerlang dan aktif dalam aktiviti kokurikulum.

“Penerima ANC harus memiliki kemahiran kematangan tindakan, rasional, kreatif, proaktif, cergas dan memiliki personaliti yang membanggakan. Pemilihan dibuat melalui dua jawatankuasa pemilihan yang terdiri daripada pensyarah dan pegawai UPM,” katanya pada Majlis ANC ke-11 yang berlangsung di Hotel Marriot di sini.

Ucapan wakil penerima pelajar disampaikan oleh Mohd Norhisham Abdullah, Bachelor Sains Bioindustri dan Koh May Ling, Bachelor Sains dan Teknologi Makanan.



*Naib Canselor UPM, Prof. Datuk Dr. Nik Mustapha (kiri) menyampaikan anugerah kepada salah seorang penerima, Mohd Norhisham Abdullah, Bachelor Sains Bioindustri.*

Terdapat tujuh kriteria utama penerima anugerah itu ialah calon yang mempamerkan sikap kepimpinan yang berwibawa, melibatkan diri dengan aktiviti amal kebajikan kepada masyarakat, aktif sukan di peringkat universiti, kebangsaan ataupun antarabangsa.

Calon juga dinilai dari aspek penglibatan dalam aktiviti menguji ketahanan fizikal dan mental,

aktif dalam aktiviti kebudayaan dan kesenian, melibatkan diri dalam aktiviti kreatif seperti rekacipta, penulisan, debat, syarahan dan aktif menyertai kursus dan bengkel.

ANC yang dianjurkan sejak 10 tahun lalu telah menyaksikan seramai 680 pelajar berjaya menerima anugerah yang dianjurkan oleh Bahagian Hal Ehwal Pelajar, UPM.



*Datuk Naib Canselor beramah mesra dengan penerima-penerima ANC selepas majlis makan malam tersebut.*

**Berita ini disediakan oleh Seksyen Media, Bahagian Komunikasi Korporat UPM. (Ili Syazwani Zahimi 03-89466013).**